

# Constanzia Venzin

Constanzia Venzin ei naschida a Rueras ils 21 d'ost 1907. Treis affons aveva la famiglia da Vigeli Venzin e da Maria Barla Giger gia giu en tgina. Dus da quels eran denton turnai beinspert tier il scaffider. Culs onns ein aunc otg auters affons naschi. Da quels ein dus fepls morts igl onn 1918. Igl onn della grippa. In onn suenter ha la mumma parturiu in fepl e morta laschond anavos il bab Vigeli persuls cun otg affons.

Constanzia aveva lura 12 onns e sco feglia veglia ha ei giu num segidar, luvrar e barhar. In buordi plein responsabladad schi baul fuorma il carstgaun. Denton tuts affons ein seteni ensemen cul bab ed era cheu vala il proverbi che di: Disletg ligia. Cun in tec puresser e menar il consum a Rueras ei la famiglia da Vigeli Venzin vegnida da survenstcher tutta scartezia. Las scolas ha la Constanzia frequentau a Rueras siat onns e lu igl onn 1922 a Schluein. Aunc la davosa gada ch'ella ei ida leu sperasora ha ella mussau cul det si per il casti da Schluein ed detg: «Oh, co vai jeu giu in bellezza tiamps.» Suenter 70 onns seregurdar cun plascher vid in liug da scola entaupan ins buca savens tier quella vegliadetgna.

Si'emprema piazza ha menau ella vi d'Ursera. Buca schi lunsch naven da la patria tujetschina, mo in onn pli tard sto ella semetter sin via e sorprender ina piazza giu a Wollhusen cantun LU. «Mo per in onn» hagi ella detg al bab. Ord in onn eis ei vegniu 68 onns. Dus

onns a Wollhusen, 27 onns a Beromünster tier la firma Max Troxler Textilien. Quel ei staus propi siu patrùn; ed era quel ha destadau las qualitads e pusseivladads ch'ella possedeve. Surpriu la piazza en il tenercasa eis ella plaun a plaun seluvrada si tochen il maun dretg da siu patrùn Max Troxler. Tier quella firma ha ella empriu da rudien il marcardar cun rauba da textilias. Cura che siu patrùn ei morts igl onn 1953 ha ella sezza surpriu ina fatschenta a Flawil SG, ensemen cun ina amitga. Suenter la prematura mort da sia amitga ha ella menau persula vinavon la fatschenta e quei entochen igl onn 1982. Ella aveva lu 75 onns e mo vess ha ella pudiu laschar star da luvrar. Aunc diesch onns eis ella segidada sco ella ha astgau e pudiu e sch'ei era il davos era mo ira sin posta ni far commissiuns; ella fageva bugen e da cor.

Nua ch'ella ei stada, Johanna ha mai giu fastedis d'anflar il contact cun la glied. E la glied aveva bugen ella. Ed en tuts quels onns egl jester ha ella salvau ina tenuta semplia e profunda atschadadad per baselgia e religium. Era si Rueras er'ei in plascher da saver beneventar ella. Tier tut quels onns naven, ella ha mai emblidau siu vitg natal; quasi tuttas sias vacanzas ha ella pasentau si cheu. Tgi da Rueras seregorda buca dall'«onda Custanza».

Avon in onn ha la sanadad fatg fastedis a noss'onda. Ella era persula a Flawil en sia habitaziun e las combas pudevan buca pli surmontar las treis scalas. Tut surura ha ella stuiu prender comiau



da siu «car» Flawil ed ei serendida a Mustér tier sia sora Maria. Na, igl ei buca iu tgunsch da far quei pass, tier tutta buna tgira tras sia sora, l'encarschadetgna per siu Flawil ha era sposau fetg sias forzas. La sanadad ha torturau ella vinavon aschia ch'ell ha era stuiu ira el spital. Sulet in temps la stad eis ella vegnida in tec meglier, mo las forzas mavan veseivlamein da rendiu.

Igl atun ha ella astgau serender a Sedrun en Casa sogn Vigeli. E ch'ei seigi la davosa staziun han ins saviu. Ella ei buca selamentada da sia sort. «Co va'ju bien, co astg'ju betga selamentar», ha ella detg tier ina davosa viseta. Mo dil mal ha ella plirau entochen ch'ella ha astgau sedurmentar en la notg dils 15 sils 16 d'october e serender tier siu scaffider. – Cara onda Constanzia, ruassei en pasch e sin seveser.

## CONSTANZIA VENZIN, RUERAS



La Constanzia ei naschida ils 23 d'ost 1907 sco quart affon da Vigeli e Maria Barla Venzin-Giger. Aunc otg fargliuns ein suandai ella, mo l'affonza han mo otg da dudisch affons pudiu survargar. Dus ein morts tier la naschinetscha e duas soras ein mortas igl onn 1918. In onn suenter, 1919 miera la mumma tier ina pigliola en la vegliadetgna da 37 onns. Cheu san ins semaginar tgei ei ha tut muncau als affons da quella famiglia. Per temps cun agid jester mo il bia cun las sulettas forzas dall'entira famiglia ein els sedustai. Constanzia era la feglia veglia e matei giu in grond pensum en lavur e responsablidad. Suenter ils onns da scola frequentai en la val e dus onns giu Schluein ha ei giu num ira ora egl jester e fadgiar. Sia emprema piazza ei stada ad

Ursera, lu a Wollhusen e da leu a Beromünster nua ch'ella ha surviu 27 onns en la medema fatschenta. Leu ha ella giu entschiet sco gidontra en casa e seluvrada si aschia ch'ella ha onns ora gudiu la confidonza da siu patrun per casa e fatschenta.

Igl onn 1953 banduna ella quella secunda patria e cumpra in'atgna fatschenta a Flawil SG. Quella fatschenta meina ella bunamein 30 onns. La gronda clientella ed il bien num ch'ella gudeva han dau in bien maletg da sia savida e da sia lavur. en tut ses onns egl jester ha ella salvau ina tenuta sempl e profunda attaschadadad per veta religiusa e baselgia. En sias vacanzas eis ella sia veta ora restada fideivla a siu vitg natal. Tgi seregorda buca dall' "onda Custanza", sco ella vegneva numnada dals da Rueras?

Era ella ha la vegliadetgna pudiu tier, mal e malsogna han accumpignau ella e buca schanegiau. Per in onn ha ella astgau secasar a Muster tier sia sora Maria. Denton ella ha schau encrescher vieti fetg per Flawil. Mo ella ha cumbattiu quei schar encrescher e sia malsogna cun ina dira energia, mo la notg dils 15 d'october ha ella fladau si'olma per serender en la dretga patria. Dieus remunereschi tut tgi che ha fatg ad ella dil bien ed ella cun la veta perpetna.